

Naqqiut**Siunnersuummut 12. april 2019-imeersumut taarsiissut****(Naalakkersuisup akisussaasuusup taaguutaanik allannguinerit)**

**Kitaani qassutikut qallorneqarnissaannut suliniutissatut pilersaarummik
 Naalakkersuisut UKA2019-imut saqqummiussequllugit peqquneqarnissaannik
 Inatsisartut aalajangiiffigisassaattut siunnersuut.**
 (Inatsisartuni ilaasortaq Aqqaluqaq B Egede, Inuit Ataqatigiit)

Akissuteqaat

(Naalakkersuisut Siulittaasuat)

Siullermeerneqarnera

Naalakkersuisut Inatsisartunut ilaasortaq Aqqaluqaq B Egede, Inuit Ataqatigiit,
 aalajangiiffigisassatut siunnersummik saqqummiussaqneranut qutsavigaat.

Kitaani aalisarnermut atortut qimaannakkat annaasallu avatangiisinut ajornartorsiutaanerannut
 Naalakkersuisut isumaqataapput. Aalisarnermut atortut annaasat ajoraluwartumik Kalaallit
 Nunaanni sineriak tamakkerlugu imartatsinni avatangiisinut ajornartorsiutaapput.
 Aalisarnermut atortut qimaannakkat annaasallu ajornartorsiutaapput, pissutigalugu
 piginnittuminnit annaaneqarnermik kingorna piffissami sivisumi aalisartuarsinnaasarmata.
 Aalisakkat annaasat aalisakkanik tunisassiornermut ilannguttussaagaluarlutik aalisakkanut
 qassutinut taaneqartartunut qassutiniiginnartarpot, plastikkilu atorlugu qassusiarineqarsimasut
 immami avatangiisinut mingutsitseqataasarput.

Taamaattumik Naalakkersuisut pingaartippaat, aalisarnermut atortut annaasat atorunnaartullu
 katersorneqassasut nunamullu qallorneqarlutik illersorneqarsinnaasumik iginneqarnissaat
 siunertalarugu. Aalisakkanut qassutinik allanillu aalisarnermut atortunik saliinerup
 pinngortitami immamilu avatangiisinut plastikki aamma plastikkip sananeqaataanik
 tappiorannartut (mikroplast) annikinnerulersissavaa. Immap pissarititaanik atuisut
 akisussaaffimmik tiguseqataassapput tamassumanilu nammineerlutik qassutit annaasatik
 isumagisassavaat.

Naalakkersuisut 2017-imi aalajangersakkanik arlalinnik atulersitsisimapput, taaku
 aalisartumut pisussaaffiliippot nammineq qaqtisissassasoq, aalisartup aalisakkat
 annaasimappagit. Aalisartoq pisussaavoq, Kalaallit Nunaanni Aalisarsinnaanermut
 Nakkutilliisoqarfimmot qassutit allallu aalisarnermut atortut annaaneqarsimasut pillugit
 nalunaaruteqassalluni, immamit qaqtinissaat iluatsissimanngippat. Aalisartup
 nalunaarutigissavaa sumiissuseq, piffik, qassutit allallu aalisarnermut atortut suut
 annaaneqarsimanersut, qassutit allallu aalisarnermut atortut qanoq annertutigisut
 pineqarnersut, aammalut qassutit allallu aalisarnermut atortut immamit qaqtiniarlugit

misiliisoqarsimanersoq. Qassutit allallu aalisarnermut atortut annaaneqarsimasut aamma aalisartup kommuni innuttaaffigisaanut nalunaarutigineqassapput.

Naalakkersuisut nunat avannarliit suleqatigiinneranut atatillugu, 2017-2019-imi qassutit allallu aalisarnermut atortut annaaneqarsimasut pillugit oqallittarnerni peqataasimapput. Nunani avannarlerni qassutit allallu aalisarnermut atortut annaaneqarsimasut, qassutit allallu aalisarnermut atortut annaaneqarsimasut annertussusaata nalunaarsorneri, qassutit allallu aalisarnermut atortut annaaneqarsimasut qallorneri, qassutit allallu aalisarnermut atortunit atortussat atoqqinneqarsinnaasut katersornissaannut tigooraaffissanik pilersitsineq, kiisalu eqakkanik katersineq annertuumik ukkatarineqarput. Nunani avannarlerni qassutit allallu aalisarnermut atortunut annaaneqarsimasunut soqutiginnineq aamma ukkataqarneq, sumiiffimmut qanittumut taamaallaat killeqartinneqanngilaq, aammattaaq taakku issittumi sumiiffinni mingutsitsinermut ajornartorsiutaasut annertunerusumik ukkatarineqalersimapput. Naalakkersuisut isumaqarput, qassutit allallu aalisarnermut atortut annaaneqarsimasut annikillisinneqarnissaata pingaassusaa pillugu annertunerusumik aamma pitsaanerusumik paasissutissiiluni suliaqarneq pisariaqartinneqartoq, kiisalu nalunaaruteqartarneq, nalunaarsuineq kiisalu qassutit allallu aalisarnermut atortunik annaaneqarsimasunik galluineq annertunerusumik ukkatarineqartariaqartoq.

Kitaani aalisakkanut qassutinik aalisarnermullu atortunik allanik tamakkiisumik saliineq – nunalu tamakkerlugu – annertuumik aningaasartuutaassasoq naatsorsuutigineqarpoq. Suliniutip pilersaarusrornerani alloriarnissami siullermi sammiviusoq tassaavoq, saliinissamik suliassap annertussusiata matumanilanganngullugu tassunga atasumik inuiaqatigiit aningaasaqarneranni aningaasartuutissat allaaserinissaat.

Avatangiisinut Aningaasaateqarfimmik pilersitsinissaq 2018-imi ukiakkut ataatsimiinnermi Inatsisartut akuersissutigaat. Inuup inuuniarnermi atugai aamma uumasut naasullu piujuannartinnissaannut ataqqinnittumik inuiaqatigiit ineriarorneranni piujuartitsineq nukittorsarneqassasoq Avatangiisinut Aningaasaateqarfip siunertaraa sunniuteqaqataaffigissallugu. Iluarsartuullugit pilersaarusanut, avatangiisut iluaqutaasunut, aamma avatangiisinut ajornartorsiutit aqunnissaannut periutsinik nutaanik misissuisunut ukiut tamaasa aningaasat immikkoortinnejartassapput. Ukioq maannamiit aalisakkanut qassutaarsiutit atortullu annaasat qimaannakkallu pillugit iluarsartuullugit pilersaarusat Avatangiisinut Aningaasaateqarfik aqqutigalugu Naalakkersuisut tapersorsorniarpaat. 2019-imi siunertamut 1 million koruunit immikkoortinnejartassapput.

Avatangiisinut Aningaasaateqarfip akisussaaffigisaanik nuna tamakkerlugu aalisakkanut qassutinik allanillu aalisarnermut atortunik saliinermut aningaasat amerlanerusut pissarsiariniarlugit qularnaveeqqusiiinermik aaqqissuussineq aaqqiissutissatut eqqarsaatigineqarsinnaavoq. Aalisakkanut qassutinik pisinermi qularnaveeqqusiiinermik aaqqissuussinikkut qularnaveeqqusiiissut peqqussutigineqarsinnaavoq qassutinillu atorunnaartunik tunniussinermi qularnaveeqquq tunniunneqaqqissaq. Qularnaveeqqusiiinermik aaqqissuussinerup pitsaaqutaa tassaavoq, nammineq qassutigisat atorunnaartut utertitsinnissaannut kajumissuseqalersitsissammat peqatigitillugu aalisakkanut qassutit atukkat katersornissaannut kajumissaarutaassalluni. Peqatigitillugu qularnaveeqqusiiinermik aaqqissuussineq uunga "tunngaviusumik mingutsitsisoq akiliissaq" tulluarpoq aamma qularnaveeqquq akiliutigineqanngitsut immikkut saliinermut suliniutissanut atorneqarsinnaapput.

Naalakkersuisut taamatut oqaaseqarlutik allangguutissatut siunnersuutigineqartoq akuerineqassasoq inassutigaat.

Allannguutissatut siunnersuut: Kalaallit Nunaanni sineriak tamakkerlugu imartatsinni qassutit allallu aalisarnermut atortut salinneqarnissaannut suliniutissatut pilersaarummik Naalakkersuisut UPA2020-imut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.